

L'INCHIESTA

Sua Maistà Liuni lu Sbrananti
S'addivava un mignanu di `nzalata;
ma un ghiornu Sua Ccillenza l'Elefanti
cci lu scafazza cu `na so ciampata.

Lu Gabinettu, fidili e zilanti,
ordina inchiesta la stissa jurnata:
da cui `nni risurtò, chiaru e lampanti
ca l'Ursu aveva datu la pidata.

Ma l'Ursu, cu lu so stili pirfettu,
scrissi: "La Vacca fu: dubbiu nun resta."
Scrissi la Vacca: "No, fu lu Crapettu."

Lu Crapettu la scarrica a lu Surci...
E, pi accurzalla, concludiu l'inchiesta
Ca la ciampata era pedi di Purci.

Vanni Pucci